

TE NENEURAA API

NENEIHIA I ROTO I TE PIHA NENEIRAA A TE EKALESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 1

Tenuare 1937.

Mat. 31.

Ei auraro aroha rá to outou ia outou iho. Ua hope roa hoi ta te ture i te parau hoê nei, oia te parau ra e, E aroha oe i to taata tupu mai to aroha ia oe iho na. Galatia 5:13-14.

E faautua te Atua i te taata atoa i te faito ta'na i faito atu ia vetahi e ra. B F. 1:10.

Ta'u Pure no te Matahiti Api.

I TE haamataraa o teie Matahiti Api, e to'u Metua i te ao ra, a tauturu mai Oe ia'u ia faaoaoa i to'u utuafare e tei faaati mai ia'u, ma te ite e, ia haamoe vau ia'u iho no te tautururaa ia vetahi ê, o te oaoa e te haamaitairaa tei hau atu i te rahi.

A tauturu mai Oe ia'u ia ite i te natura i roto i to'na nenehe, tei faaati ia'u, te maa o te fenua, o te moana e to te reva, te mau mahana maitai, te ua e te mau tiare. A tantu-

ru mai Oe, e te Fatu, ia haamana'o noa vau e, na Oe i hamani i teie mau mea atoa ia oaoa matou nei.

A tauturu mai Oe ia aro vau i te mau mea au ore te ume ia'u i muri e te rave atu i te oaoa e te maitai no to'u oraraa mure ore, i te Mesia ra. Te ino, te nounou, te mau au ore e te mau huru ino atoa, a mono mai Oe i te reira i te aroha, te au taeaeraa, te faaoromai e te hinaaro i te faatupu i te tauturu i to'u taata tupu.

A tauturu mai Oe ia ite au i te huru mau o to'u mau fetii e to'u mau hoa, ia haamana'o noa vau e, o Oe to ratou haavâ, eiaha o vau.

A tauturu mai ia oaoa vau i te mau mana'o maitai e te mau tautururaa te tuuhia e to'u taata tupu. Ia mauruuru vau i te Evanelia, i te mea e, te haapii maira te reira ia'u ia vaiiho i te mau taata atoa ia haamori mai te au i to ratou hinaaro.

A tauturu mai Oe ia haamana'o noa vau i te ite no te Evanelia, e ia rave oaoa i te mau mea atoa te faauehia mai.

A horoa mai Oe i te ravea no te haapiiraa'tu i te Evanelia i te mau taata atoa te farereihia e au, e a tauturu mai Oe ia'u ia haapao maitai i te mau ture ia ite ratou i te mau ohipa maitai te ravehia e au e to ratou mau hotu, ia tia ia ratou ia haamaitai i to Oe Io'a.

A tauturu mai Oe ia faatupu i te mauruuru no te mea maitatai i roto i teie nei ao e ia farerei au i to'u mau taata tupu, a tauturu mai Oe ia ite au i to ratou maitai, (tei ore i itehia) e ia ore vau ia parau i te hoê mea ino no ratou, e ia tauturu â vau ia ratou i roto i to ratou mau peapea, i te tahitiraa i te mou'a te aratai atu ia ratou i te maitai e te mau mea nenehe o teie nei oraraa, e ia Oe na, e te Atua, e i te Ora mure ore.

NA TE HEHEURAA API.

Te Tumu no te oraraa o te Taata.

NOA'TU te ohipa a te taata, noa'tu to'na ite e to'na paari, ua vai noa teie na nira i mua ia'na ra: *Nohea mai au? E haere au ihea? Eaha te tumu mau no teie nei ora?* Aita i faaitehia mai te pahonora e te paari o to te ao nei, no te mea e, ua mo'ehia to tatou huru hou te taeraa mai, e aita ratou i ite i te feia tei pohe no te rahi ra o taua paari nei.

Eita roa e taa te auraa o to tatou vairaa nei, maori râ ia itehia to tatou haamataraa e te hopea. Mai te mea e, teie te haamataraa e te hopea'toa ta tatou e ite nei, teihea ia te fau-faa o teie nei oraraa?

Aore tatou i vaiihohia i roto i te pouri mai te reira. No te faaroo ore ia, mai te haamataraa mai â, ua faaitehia, i tei faaroo, te auraa o taua mau mea ra, e e mea tia ia tatou ia ite i te huru mau o te ao varua e i taua ora i muri ra, e riro ia ei aratai no tatou. E tia i te Atua ana'e ia faaite mai i to tatou huru i te ao ra, e ua na reira mau hia: *O te Atua to tatou Metua i te ao varua ra, e o Iesu Mesia to tatou tuaana.*

E i reira ua faaitehia te huru o te oraraa nei; o teihea ra te tumu? Teie ia: no te oaoa mure o te taata nei. Nafea ra te roaraa te reira oaoa? Teie ia: na roto i te Evanelia a Iesu Mesia. Ia noaa te ite, te reira ia te hanahana o te Atua.

A faaore i te raveraa i te hara, e a haere noa i mua, e i mau maite outou i ta'u parau, e pipi mau ia outou na'u i reira. *E ite ia outou i te parau mau e na te parau mau outou e faatiamâ. Ioane 8:31-32.*

Papaihia e Tena Oromelua.

To Tatou Tiamaraa.

I ROTO i te ao varua, na mua a'e te tumu o teie nei ao i hamanihia'i, ua haaputuputu te Atua i te mau varua i roto i te hoê apooraa rahi.

I roto i taua apooraa ra, ua faaroo tatou i na mana'o êê e piti; te hoê no to tatou Faaora, e te tahi, no to tatou Enemi. Ua parau mai te Enemi: Teie au, o vau ta oe e tono atu, e riro vau ei tamaiti na Oe e e faaora vau i te mau taata atoa, ia ore te hoê ia mo'e ê atu, area râ, na oe e horoa mai ia'u nei to oe hanahana e to tura atoa hoi. Ua parau mai te Faaora: E to'u Metua, ia haapaohia to Oe hinaaro, ei ia Oe te hanahana e a muri noa'tu.

Te matamua, no to'na teoteo, ua mana'o oia e faaore roa i to tatou tiamâraa, oia hoi, eita oia e faatia ia tatou ia maiti i te mea ta tatou i hinaaro. Te tahi râ, ua faatia noa oia i to tatou tiamâraa; e haere mai Oia no te rave i te hoê ohipa rahi te ore roa e tia ia tatou iho ia rave, oia hoi, ia faaho'i ia tatou i mua i te aro o te Atua.

Ua faatia roa-hia to tatou tiamâraa, e i teie nei, e nehenehe ia tatou ia maiti i te mea ta tatou i hinaaro, te mea ino e a ore ra, te mea maitai. Mai te mea aita i tia ia tatou ia tamata i te mea ino, nahea tatou e ite ai i te mea maitai? Aita o Adamu ma i ite i te mea maitai e te mea ino i roto i te ô i Edene e tae roa'tu i te taime i amu ai raua i te hotu i rahuihia. Area ra, ua faatihia to raua tiamâraa ia maiti i te mea ta raua i hinaaro. No reira, mai te mea aita tatou i ite i te mea maitai e i te mea ino, eita roa tatou e haere i mua; no te mea, ia rave tatou i te hoê ohipa ino, e i muri iho, ia ite tatou e, e mea ino te reira, eita tatou e rave faahou i te reira, te roaa nei ia ia tatou te ite e te haere atoa nei tatou i mua.

Eaha te fuito no to te taata tiamâ ?

Teie ia: to'na ite. Ua faatia te mau hau i te mau ture tumu no te faatereraa i te hau, e ia ite tatou i te taatoaraa o te reira mau ture, ua ite atoa tatou i te mau mea e tia ia rave e te mau mea te ore e tia ia rave. Hoê â ia te taata i mua i te ture a te Atua. E tai'o tatou i roto i te II Korinetia i te pene 3 e te irava 17: *E teie nei, o te Fatu taua varua ra, e tei ia'na te Varua o te Fatu ra, tei reira te tiamâ.*

Eaha te peu o te taata tiamâ ?

Teie ia: haapao i te ture. Ua ite tatou, ia rave tatou i te hoê ohipa ino, e haru te mutoi ia tatou e e afai oia ia tatou i te fare tapearaa. E ua faaorehia to tatoutiamâ i te reira vahi, oia hoi, eita e tia ia tatou ia haere noa i rapae ia ore ia tuuhia. Hoê â ia te mau ture a te Atua; ia hara tatou, eita tatou e farii faahou-hia i te reira vahi, e ua ore te haamaitairaa no ô mai i te Atua ra.

Eaha te îraa o te tiamâ ?

Teie ia: o te oaoa ia. E parau mau roa te reira, no te mea ia haapao tatou i te mau ture atoa te tuuhia ia tatou e aita ihoa i hapa, ua roaa ia ia tatou to tatou oaoa, no te mea, aita tatou i mau i te auri, te farii noa nei ra tatou i te mau maitai no ô mai i te Atua ra, e ua roaa ia tatou te tino maitai, oia hoi, aita te ma'i e tupu i nia ia tatou e ua manuia ta tatou mau ohipa.

Te na ô mai nei te uiraa: *Eaha te mea te faatiamâ ia tatou?* Tei roto i te Ioane i te pene 8 e i te irava 32 te pahonora; *E ite ia outou i te parau mau, e na te parau mau outou e faatiamâ.*

E parau mau ana'e te ture, e ia haapao tatou i te reira, ua roaa ia ia tatou te îraa o te oaoa e te haere nei tatou i mua.

Papahia e Tihoti Oromelua.

NO TE HĦĦ TE INO I TE AO NEI.

ΠE tumu no te ino i roto i te ao nei, ua faaitehia mai ia na roto i te faahemaraa a Satane ia Iesu. I muri a'e i To'na baptizoraahia, ua arataihia o Iesu, e te Varua, i roto i te medebara e i reira Oia e faahemahia'i e te Diabolo. E maha ahuru mahana e e maha ahuru po i To'na haapaeraa i te maa e ua poia roa Oia.

I teie taime, i te tuatapapa o te ao nei, ua fatata o Iesu i te haamata i ta'na ohipa pororaa Evanelia e i te faaoti i te reira na roto i To'na poheraa i nia i te satauro. Mai te mea ia manuia Ta'na ohipa e ofatihia ia te mana o te ino. . . No reira aita te Diabolo i hinaaro ia manuia Ta'na ohipa, no te mea, e mana rahi to te Diabolo i te ao nei e ua parauhia e, o oia te arii o te ao nei. Mai te mea e tia ia'na ia faahi'a i te Tamaiti a te Atua, ua riro ia te opuaraa a te Atua ei mea faufaa ore e e riro o Satane ei fatu no te ao nei. E opuaraa ino roa hoi te reira, area râ, o te reira te ohipa a Satane i rotopu i te taata nei, no reira ua haamata Satane i te faahema i te Tamaiti Fanau Tahi a te Atua.

Ua tamata te Diabolo i na ravea e toru no te faahema ia Iesu, aita roa ra oia i manuia i te vahi ta'na i titan. I te matamua, ua tamata oia na roto i te hinaaro maa e te hinaaro o te tino; e te piti, te hinaaro haamaitairaa a te taata nei, e te toru, te hinaaro moni e te mana rahi. Aore o Iesu i auro ia'na e to'na mau mana'o iho, e na roto i te reira ua faaite Iesu ia tatou, e mea nahea i te faaore i te mana'o ino te tuhia, e te Diabolo, i roto ia tatou nei.

Te vai noa nei taua mana'o ra i roto ia tatou nei, *No te aha te ino i te ao nei, e eaha o Iesu i faahemahia'i e Satane?* E feruri tatou i to tatou here ia Iesu Mesia. Ahiri e mea ohie

ia faaora i te taata nei, e faaoromai anei tatou i te hamani ino raa tei tae mai i to tatou haamoriraa i te Atua? Aita! Area ra, na roto i te ino ua ite tatou i te maitai, e na roto i te maitai ua ite atoa hoi i te ino. Ahiri aita e mea ino, aore e tia ia tatou ia oaoa i roto i te maitai, no reira, ia amu tatou i te mea avaava no te iteraa i te mea monamona.

Ua horoahia mai, e te Atua, to tatou tiamâ. Aita te Atua e tapea i to tatou tiamâ a faaue mai ai ia rave tatou i te maitai. Ua horoa maira Oia i to tatou tiamâ, ia maiti tatou i te mea i hinaarohia e tatou, te maitai e a ore ra te ino, e na roto i te raveraa i te maitai e faaho'ihia tatou i mua i te aro o te Atua. Ia rave râ tatou i te ino, e a ore ra, e faatia i te mana'o ino o te Diabolo, ua riro tatou ei tavini no'na, e e tapeahia to tatou tiamâ, no te mea, ia haamata tatou i te rave i te ino i tuuhia mai e te Diabolo, e mea fifi roa ia faarue i taua mau peu iino ra, e e riro tatou ei tavini no'na i te raveraa i ta'na ohipa faufau. No reira, eiaha tatou e faarue i to tatou tiamâ, ia rave râ tatou i te maitai e tia'i.

Papaiahia e Toma Oromelua,

E RIRO ANEI TATOU EI ATUA?

Te tia noa ra te Atua i te amuiraa o te feia mana ra, te haava ra Oia i rotopu i te mau Atua ra. Salamo 82: 1.

Te tupu ne i â te mana'o faahapa o te tahi mau taata i nia iho i taua vahi nei, no te mea te haapii nei te Ekalesia e, e riro tatou ei mau Atua na roto i te haapaoraa i te man ture e te mau faaueraa o te Evanelia nei.

No reira te haapapu faahou atu nei â vau i nia iho i taua vahi ra, no te mea, e ere i te mea maere ia riro tatou mai to

tatou Metua te huru, o te huru mau iho â ĩa; mai te mea ra eita tatou e riro mai to tatou Metua, ei reira mau tatou e maere ai.

Nahea ra tatou e riro ai mai to tatou mau metua pae tino nei? Maori rā, ia faatura'tu ia'na, ia faaroo i ta'na mau parau e ia haapao i te mau mea ta'na i hinaaro ia na reira tatou i to tatou mau metua, i te hereraa'tu ia'na, e mauruuru roa ĩa oia ia tatou, e ia tae i to tatou paariraa ra, e riro tatou mai to tatou mau metua te huru, e haaparahihia tatou i te utua fare e e riro tatou ei faatere no te utuafare, e te mau mea atoa, e faafanau faahou atura i te tamarī, e riro tatou ei mau metua.

Hoē â ĩa huru e to tatou Metua i te ao ra.

Te na ô maira te reo mau iho o Iesu i roto i te Ioane, pene 10 e te irava 34-35; *Ua parau atura Iesu ia ratou, e ere anei ua papaihia i roto i ta outou ture na, e ua parau na vau e atua outou? I parau te ture i te feia i parau hia'tu i te parau a te Atua ra e, e atua ratou e aore hoi i hapa te parau i papaihia ra.* Te na ô atoa maira i roto i te Salamo 82:6: *Ua na ô a'era vau, e atua outou, e tamarī ana'e outou na te Teitei.*

Papaihia e Tu a Keha.

E o tei pohe i te ma'i i rotopu ia outou na. Ia titauhia te mau peresibutero no te Ekalesia, too piti a'e, e a ore ra, ia rahi atu, ia pure ratou e ia tuu hoi i to ratou mau rima i nia ia ratou i to'u ra i'oa.

B. F. 42:43-44.

TE FAAIPOIPORAA MATAMUA

Ua faariro te Fatu i te faaipoiporaa o te tane e te vahine ei ture, e na roto i te reira e tia'i i te mau varua ia haere mai i raro nei ia rave i te hoê tino e ia tomo mai i roto i te ai'a piti. Na te Fatu iho i rave i te faaipoiporaa matamua tei ravehia i nia i teie nei ao, no te i'o e te ivi i nia i te fenua nei. Aita vau e parau nei e, no te tahuti; no te mea, i te faaoti-raahia te faaipoiporaa matamua, aita e poheraa i raro nei. Ua faaotihia te faaipoiporaa matamua, tei tae mai te parau ia tatou nei, i rotopu i na taata tahuti ore,— e mea tahuti ore raua; aita to te pohe e mana i nia ia raua.

O outou tei tai'o mai, eaha ia to outou mana'o ia faaotihia iho te hoê faaipoiporaa i rotopu i na taata te ore e tia ia pohe? E mana'o anei outou e, ua taatihia raua no te tahi tau matahiti noa iho, e i muri iho e faaorehia te mau fafau atoa e e haapararihia te parau faaipoiporaa ra? E mea tia anei te reira? Aita. E parau ra te taata atoa e, e mea hape ore te ohipa a te Atua, e no te mea aita â te hara i afai mai te hape i nia i teie nei ao, eita roa e tia ia tatara i tei taatihia e te Atua, ia haamouhia e ia faataahia na roto i te hoê mana no raro a'e i te ao Tiretiera, no reira e mea mure ore te reira; e mea mure ore taua faaauraa ra; e mea mure ore te titiro ta Iehova i tuu i nia ia Adamu raua o Eva e aita te reira oro'a i faatupuhia ia haamouhia e ia ta otia hia.

Ua itehia e, e mana'o huru ê roa to te Momoni no nia i te faaipoiporaa; te faaroo nei matou e, ia faaipoipo iho â te taata, eiaha ra no te hoê tau noa iho, no te mure ore ra. E parauhia paha e, e mana'o huruê mau te reira, ia faaipoipo hia no te tau mure ore. E ere ra te reira i te mana'o huru ê

no te mea, ia hi'opoa maitai tatou i te mau parau mo'a, e ite ihoa tatou e, ua tuuhia mai te faaipoiporaa matamua ei haapiiraa na to te ao atoa nei, ei hohoa te au ia peehia, no te mea, aita te reira i haapaohia no te taeraa i te pohe, aita hoi to te pohe e mana a faatiahia'i taua oroa ra i te reira tau, area râ e haamaitairaa mure ore tei tuuhia i nia i to tatou na Metua matamua.

Oretoni Parata.

IA MÂ OUTOU?

⑥ TE hoê o te mau parau tei hau atu i te papu e te faahuru ê ore, o teie ia: IA MÂ OUTOU.

E mea pinepine to te mau parau mo'a faahitiraa i te parau no te Viivii ore. Te ite nei tatou ua tamâ te Faaora i te mau lepera. Ua tamâ atoa Oia i te Hiero na roto i te tiahiraa i tei haaviivii ia'na. E mea pinepine To'na faahitiraa i te parau no te mau varua viivii. Na roto i To'na horoiraa i te avae o ta'na mau pipi, ua haapii mai Oia i te tapao no te mârâa o te tino nei. I te mau taata lepera, ua parau atu Oia, ia mâ outou. Ua parau atoa Oia no te maa viivii. Ua faahapa Oia i te mau Pharisea; ua parau atu Oia ia ratou no nia i te viivii ore e ua faaan Oia ia ratou i te mau vairaa tupapau i faateateahia ra, o tei nehenehe i rapae au a'e, area o roto ra, ua i ia i te ivi taata pohe, e te mau mea faufau.

E mea papu roa, ua hinaaro o Iesu, i roto i Ta'na mau parau no te viivii ore e te viivii i te mau taima Ta'na i parau, e faaite i To'na mana'o no nia i taua vahi ra, oia hoi, e mea faufaa roa Na'na te vivii ore o te tino, te mana'o, te mau ohipa, te maa e te ahu.

I to tatou mau mahana nei hoê â ia te faufaa o te Viivii ore. Na te faito o te maitai o te maa e te ahu i faaora e rave rahi te tauatini o te taata. Oia atoa hoi te mau mana'o e te mau ohipa viivii ore, ua faaora ratou i te mau varua e rave rahi te tauatini.

Ua titauhia i te mau Feia Mo'a no te mau Mahana Hopea Nei te Viivii ore o te tino, te mana'o e te mau pen atoa. A rave tatou ei aveia na tatou e ia haamana'o noa tatou i te parau a to tatou Faaora: **IA MÂ OUTOU.**

Papaihia e Marcel BONNET.

TE MAU PARAU API

Ua ravehia te vari ei raau.

I roto i te hoê ve'a te faaitehia ra e, ua haponohia, i te fenua Baratane, te tahi nau tane vari no te vahi pape pihaa mahanahana no Rotorua, Niu Zelani. Te tumu i na reirahia'i, no te rapaau raa ia i te tahi huru ma'i te ore roa e ora i te tahi mau raau.

E ere teie i te ohipa apî, no te mea ua ravehia, e te mau feia tahito no Europa, te tahi mau huru vari ei raau no te tahi mau ma'i e i teie nei â mau mahana te ravehia nei te tahi huru vari, e te mau taata hahu taa no te fenua America, no te tauramiraa i te taata.

E Fare Pureraa apî.

Te faaitehia nei e, e te mau Feia faatere no te Ekalesia, e patuhia i teie matahiti e haere mai nei, i te oire ra o Oahu, Vaihi, te hoê fare pureraa apî o te riro ei fare nehenehe roa. E vai i roto i taua fare pureraa ra e toru nau piha rarahi-roa; i roto i te hoê e o el.000 taata ia parahi, i roto i te tahi e 400 ia e i roto i te toru e o ia e 750.

Te faaite atoa hia ra e, e patuhia teie nei fare pureraa apî no te moni ra e toru hanere tauatini, 300,000, tara moni marite, e na te mau melo no taua titi ra e aufau i taua moni ra.

E vahine itoito mau.

I te ava'e no Atopa i mairi a'enei ua faatere te vahine Baratane ra o Jean BATTEN i to'na pahi reva mai te fenua Baratane e tae roa'tu i Niu Zelandi e ua pau ia'na, i to'na tere 11 mahana e e 55 minute.

E ati rahi mau.

Na roto te hoê ati matai e te u'a rahi tei tae i nia i te fenua ra o Luzon, Manila, ua pohe roa e 546 taata e ua mo'e atoa 1,045 taata. Te feia i toe ra ua roohia ratou i te poia, no te mea aita te hoê mea i toe mai, area ra ua tono oioi hia'tu te maa na ratou, e te hau.

E vahine aroha ore.

I te oire ra i New York, America, te vai nei te hoê vahine tei ore roa i ite i tera mea e aroha. Ua horo a'enei i ta'na tane i te haavâraa ia faataa-hia raua, ua manuia oia e ua faautuahia te tane ia aufau i te moni na'na i te mau hepetoma atoa. No to te tane aufau oreraa i taua moni ra, ua tuuhia oia i roto i te fare tapearaa e i reira ua tupuhia oia i te ma'i e ua paru-paru roa to'na tino. No to te haava iteraa i te reira huru, ua ani oia i taua vahine ra ia tuuhia ta'na tane i rapae, ua faaite atura taua vahine ra e: E mea hinaaro roa na'u ia tapea noa hia'tu ta'na tane ia tia noa ia'na ia farii i te moni tauturu na te Hau e ia faaipoipo faahou i te tane apî.

Huero moa numera hoê.

Ua tui a'enei te roo o te fenua Idaho no te umara putete, e te tufaa fenua Kansas no te to papaa. I teie nei ua tui atoa te roo o Utaha, no to'na mau huero moa, no te mea no reira te huero moa ta te Peretiteini no te Hau America e amu nei.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.